



Las Squadras

1

Informaziuns generalas e messadi tier la radunonza communal dils 16 da zercladur 2016

Messadi per la radunonza communal dils 16-06-2016

Messadi per la radunonza communal dils 16-06-2016 allas 20.00 uras a Rabius

La suprastonza communal suttametta a Vus las suandontas fatschentas:

1. Avertura e beinvegni
2. Elecziun da 2 dumbravuschs
3. Approbaziun dil protocol dalla davosa radunonza communal dils 26-04-2016
4. Rendaquen 2015
5. Rapport dils revisurs ed approbaziun dil quen annual 2015
6. Elecziun da 2 commembers per il cussegl da scola dil Consorzi da scola Sumvitg-Trun
7. Orientaziuns
8. Varia

Tractanda 3: Protocol

Dil protocol dalla radunonza communal dils 26-04-2016 sa vegnir priu investa sin canzlia communal durant las uras da spurtegl. Avon radunonza ei il protocol ultra da quei exponius per investa. Il protocol sa era vegnir abonnaus per la summa da frs. 25.00 per onn tier l'administraziun communal.

Tractanda 4: Rendaquen 2015

Il rapport da gestiun e quen 2015 ch'ei vegnius repartius a mintga casada dat sclariment en detagl sur dil quen communal 2015. Plinavon cuntegn el las ulteriuras informaziuns usitadas.

Ord quei motiv vegn quella tractanda buca presentada specialmein en LAS SQUADRAS.

A caschun dalla radunonza communal vegnan il canzlist ed il president communal plinavon a dar sclariment detagliu sur dil quen communal 2015.

Tractanda 5: Rapport dils revisurs ed approbaziun dil quen annual 2015

La cumissiun da quen e gestiun sut il presidi da *Ciril Cathomas* ha controllau ed examinau il quen communal. Sin fundament

d'art. 49 dalla constituziun communal succeda la controlla aritmetica dil quen communal entras in biro fiduziar. Quell'incumbensa ei vegnida exequida dil biro fiduziar *Cathomas + Cabernard SA* da Glion. *Marcus Holderegger* e *Giuliana Gienal* dil biro *Cathomas + Cabernard SA* han fatg la revisiun dil quen e dalla contabilitad en collaboraziun culla cumissiun da quen e gestiun. Ils rapports detagliai dalla cumissiun da quen e gestiun sco era quel dil biro fiduziar ein d'anflar el rapport da gestiun e quen 2015.

Proposta

Sin fundament dil resultat dalla revisiun propona la cumissiun da quen e gestiun alla radunonza communal:

- d'approbar il quen communal 2015 sco presentau a scret,
- da dar scarica alla suprastonza, als ulteriurs organs responsabels ed all'administraziun e d'admetter in cordial engraziament per lur engaschi en favur da nossa vischnaunca.

Tractanda 6: Elecziun da 2 commembers per il cussegl da scola dil Consorzi da scola Sumvitg-Trun

Igl onn dallas elecziuns communalas vegnan era las cumissiuns e delegaziuns elegidas da niev. Las cumissiuns cun engaschi enteifer la vischnaunca vegnan elegidas entras la suprastonza communal, quellas cul camp d'activitad ordeifer nossa vischnaunca dalla radunonza communal. Quellas elecziuns han liug alla fin digl onn dallas elecziuns. Damai ch'igl ei per il cussegl da scola buca cunvegnent d'entscheiver igl engaschi el decuors d'in onn da scola han las elecziuns dil cussegl da scola liug gia avon l'entschatta digl onn da scola 2016/2017. Ils davos onns han *Diego Deplazes* sco president e *Lucas Tuor* sco commember fatg part dil cussegl da scola dil consorzi da scola Sumvitg-Trun. Diego e Lucas han exequiu exemplarica lavur per il cussegl da scola durant in temps ch'ei ha dau fetg bia midadas en quei sector. Durant il temps digl engaschament da Diego e Lucas ei il Consorzi da scola Sumvitg-Trun naschius. Grazia alla buna lavur ei la collaboraziun cun Trun secumprovada ed il menaschi da scola funcziunescha per cumpleina cuntentientscha. La suprastonza communal deplorescha las abdicaziuns da Diego Deplazes e Lucas Tuor capescha denton quella decisiun e spera ch'ils convischins anflan forsa puspei zacu temps da s'engaschar en in'otra fuorma per nossa communitad.

Sco novas commemberas dil cussegl da scola stattan *Lucretia Jacomet* da Surrein e *Trudi Bass* da Sogn Benedetg a disposiziun. La suprastanza communal engrazia ad ellas per star a disposiziun per ina candidatura per la perioda d'uffeci 2016-2019. A caschun dalla radunonza communal sa secapescha era vegnir amplificau las propostas.

Proposta

La suprastanza communal propona alla radunonza communal d'eleger *Lucretia Jacomet*, *Surrein* e *Trudi Bass*, *Sogn Benedetg* el cussegl da scola dil Consorzi da scola *Sumvitg-Trun* per la perioda d'uffeci 2016-2019.

Informaziuns cuortas

Nova adressaziun

En connex cun la harmonisaziun dils register dallas controllas da habitonts ha la confederaziun relaschau novas directivas pertuccont las adressas dils baghetgs e dils nums dallas vias. La finamira da quellas directivas ei da possibilitar als survetschs d'agid sco era a personas buca indigenas d'anflar ladinamein ils loghens. Tenor art. 20 dalla lescha cantunala da geoinformaziun ein las vischnauncas responsablas per la fixaziun dils nums dallas vias sco era dallas numeras da casa. Ord quei motiv ha la suprastanza communal elegiu ed incaricau ina cumissiun egl onn 2013 cugl intent che quella sefatschenti cun la adressaziun e numeraziun. Da mintga fracziun da nossa vischnaunca ha ina persuna fatg part da quella cumissiun. Ella ei secumponida ord il president communal, il canzlist communal ed ils convischins dallas fracziuns *Albert Fry*, *Cumpadials*, *Augustin Candinas*, *Surrein*, *Leonard Cavegn*, *Rabius* e *Franz Monn*, *Sumvitg*. En collaboraziun cul biro d'inschigniers *Cavigelli SA* da Glion ha la cumissiun elaborau las novas adressas e la numeraziun per mauns dalla suprastanza communal. Ella seduta da suprastanza dils 22 fevrer 2016 ha la suprastanza communal approbau la nova adressaziun e numeraziun ch'ei il fretg dalla lavur dalla cumissiun. La suprastanza communal engrazia alla cumissiun per la minuziusa lavur ed exemplaric engaschi en favur da nossa vischnaunca.

El decuors dalla stad 2016 vegnan las tablas cun las numeras dallas casas e las tablas cun ils nums dallas vias montadas entras la gruppa stradala. Plinavon vegnan convischins informai el decuors dalla primavera davart la nova adressaziun e numeraziun sco era davart la vigur legala dalla nova adressaziun. Ultra da quei vegn tarmess ina gliesta da controlla che muossa a tgei instituziuns che la nova adressa sto vegnir comunicada. Nus supplichein per enconuschientscha e stein bugen a Vossa disposiziun per damondas.

Sumvitg viva

Suenter la producziun da teater «Dessous» - organisaus dall'uniun da dunnas *Sumvitg/Cumpadials* - che ha giu liug il 2014 ei l'idea naschia da fundar in'uniun da teater.

Aschia ei vegniu fundau ils 20 d'avrel 2016 a *Sumvitg* sut il num «Gruppa da teater *Sumvitg*» ina nova uniun. Igl intent dall'uniun ei da promover la producziun da tocs teatrals.

Previu ei da presentar l'emprema producziun dalla «Gruppa da teater *Sumvitg*» el decuors dalla primavera 2017.

Gruppa da teater *Sumvitg*

Camp da trenament dil CB Trun/Rabius

Il camp da trenament che ha mintga onn liug el decuors dil meins mars ei per ils giugadurs e trenaders dil *CB Trun/Rabius* mintga onn in punct culminont dalla sesiun. Ils davos onns ha il *CB Trun/Rabius* per quei intent nezegiau la buna infrastruttura da Tenero. Uonn han il giugadurs e trenaders dall'emprema e secunda ensemen cun entgins juniors A pachetau ina pli gronda valischa ed ein semess mesjamna, ils 2 da mars sin via viers *Lloret De Mar* en Spagna. Duront 5 dis han ils giugadurs e trenaders dil *CB* trenau e gudiu la bial'aura gest sper la biala mar mediterranea. Sper ils buns trenaments sin plazs da ballapei artificiali han ils participonts giu la pusseivladad da passentar bia temps ensemen.



Ils quart di dil camp ein ils 31 giuvenis semess sin via cun in bus viers *Barcelona* per prender investa dil stadion da ballapei dil renomau club *FC Barcelona*. Era sche buca tuts ein fans da *FC Barcelona* ha il pompus stadion fatg impressiun als giuvenis. Bugen havessan tuts priu in bal e sittau entgins gols sil bi plaz dil stadion. Quei ei deplorablamein era scumdau per il *CB Trun/Rabius*. Ils giugadurs han gudiu fetg il camp ed ein mo nuidis turnai anavos da Spagna la dumengia, ils 5 da mars. Nus vulein en quei connex engraziar als trenaders dall'emprema equipa *Renzo Albin*, *Carlo Tuor* e *Marcus Steiner* sco era al trener dalla secunda equipa *Bruno Steiner* per ils bein preparai trenaments e l'organisaziun da quei camp. Il camp vegn a star ditg en buna memoria a nus tuts. Plinavon vulein engraziar al president *Otto Beer* ed all'entira suprastanza per lur engaschi en favur da nossa giuventetgna. Senza lur engaschi savessan buca giugar ballapei e camps da ballapei cun giuvenis dallas vischnauncas da *Trun* e *Sumvitg* fissan buca realisabels.

Ils giugadurs dil *CB Trun/Rabius*

Editura

Vischnaunca *Sumvitg*, *Quadras* su 5, 7175 *Sumvitg*
telefon: 081 920 25 00, fax: 081 920 25 08,
e-mail: info@sumvitg.ch